

十六國春秋

冊二

蜀錄

魏崔鴻撰

李特

李特字元休巴西宕渠人其先廩君之苗裔秦併天下以爲黔中郡薄賦斂之口歲出錢四十巴人謂賦爲竇藏宗切因謂之竇人焉及高祖爲漢王始募竇人平定三秦旣而不願出關求還鄉里高祖以其功復同豐沛更名其地爲巴郡土有鹽鐵丹漆之利民用敦阜俗性剽勇善歌舞高祖愛其舞詔樂府習之今巴渝舞是也其後繁昌分爲數十姓及魏武克漢中特祖父虎將五百家歸魏魏武嘉之遷略陽洛陽拜虎等爲將軍徙內者亦萬餘家散居隴右諸郡及三輔弘農所在號巴氏虎子慕爲東羌獵將慕生有五

子輔特庠流驤特身長八尺雄武善騎射沉毅有大
度元康中氐齊萬年反關西擾亂天水洛陽扶國始
平諸郡皆被兵頻歲大饑流移就穀相與入漢川者
數萬家特至劍閣顧盼嶮阻曰劉禪有如此之地而
面縛于人豈非庸才耶同移者閻式等咸歎異之初
流民既至漢中上書求寄食巴蜀朝廷從之由是散
在梁益不可禁止永康元年詔徵益州刺史趙廞爲
大長秋以成都內史耿騰代廞廞遂謀叛潛有劉氏
割據之志騰率衆入州廞遣衆迎之戰于西門騰敗
走廞獲殺之廞自稱大將軍益州牧特弟李庠與兄
弟及妹夫李舍任回等以四千騎歸廞廞以庠爲滅
寇將軍使斷北道庠素東羌之良將曉兵法部陣肅
然廞惡其齊整殺之復以特爲督將特兄弟既怨廞

引兵歸絲竹。廡恐朝廷討己，遣長史費遠等督萬餘人斷北道。次絲竹之石亭，密收合得七千餘人，夜襲遠軍。遠軍大潰，因放火燒之，死者十八九。進攻成都，廡聞兵至，驚怕不知所爲。李苾等夜斬關走文武，盡散。廡獨與妻子乘小船走至廣都，爲其下人朱竺所殺。先是，梁州刺史羅尚聞廡叛，上表稱廡非雄才，又蜀人不願爲亂，事終無成，願欲征之。惠帝遣尚爲平西將軍、益州刺史，率七千餘人入蜀。特等聞尚來，甚懼，使其弟驤于道奉迎，并貢寶物。尚甚悅。冬十月，六郡流人推特行鎮北軍承制，封拜其弟流行鎮東將軍，弟驤驍騎將軍，少子雄爲前將軍，以相統領。進兵攻尚于成都，頻爲特所敗，乃阻長圍緣水作營。自都安至犍爲七百里，與特相拒。大安二年，部下推特爲大

將軍大赦改元為建初元年益州從事任胡說尚曰
特既兇逆侵暴百姓今又分散人眾在諸村堡驕怠
無備是天亡之時也可告諸村密刻期日內外擊之
破之必矣尚從之遣大眾奄襲特營尚出逆戰到官
桑特軍敗績死之雄稱成都王追諡景王及稱尊號
追尊曰景皇帝廟號始祖

李流

李流字元通特第四子也少好學便弓馬東羌校尉
何攀稱流有賁育之勇舉為東羌校尉平趙廞于成
都晉朝論功拜奮威將軍封武陽侯建初元年特既
見殺流自稱大將軍益州牧九月流疾篤謂諸將曰
驍騎李驍也高明仁愛識量多奇固足以濟大事然前
軍李雄也英武殆天所相可共受事於前軍以為成都

王也遂薨年五十六諸將共立雄爲主雄稱尊追諡流秦文王子龍嗣

李雄

李雄字仲雋特第三子母羅氏夢雙虹自門升天一虹中斷旣而生蕩後羅氏汲水忽然如寐夢大蛇繞其身遂有孕十四月而生雄常言二子若有先亡在者必大貴蕩以李流世卒雄長八尺三寸美容貌相工相之曰此君將貴其相有四目如重雲鼻如龜龍口方如器耳如相望法爲大貴位過三公不疑雄少有烈氣有識者皆器重之特稱益州牧以雄鎮梓潼又拜前將軍流薨雄稱大將軍益州牧治郫城以西山范長生岩居穴處求道養志之士雄欲迎爲君而臣之長生固辭曰推步大元五行大會甲子祚鍾于

李非吾節也建興元年十月雄卽成都王位於南郊
大赦改元約法七章以叔父驤爲太傅兄虎威爲太
保晏平元年三月范長生乘素輿詣成都雄迎于大
門執版延坐長生請雄對坐卽拜丞相尊曰范賢長
生勸雄稱尊號夏六月僭卽帝位大赦改元國號大
成追尊父特爲景帝母羅氏爲太皇后十月加丞相
范長生爲天地太師之號封西山侯王衡五年正月
立妻任氏爲皇后八年四月范長生卒以其子侍中
賁爲丞相長生善天文有術數民奉之如神十四年
立兄子班爲太子二十四年五月雄寢疾六月丁卯
薨年六十一諡武皇帝廟號太宗十月葬安都陵太
子班襲位

李期

李期字世運雄第四子聰慧好學弱冠能屬文雄薨班卽位雄子車騎將軍越自江陽奔喪與期以班非雄所生而嗣位心不平十月因夜哭臨越殺班於殯宮班字世文雄兄蕩第四子雄妻任氏無子養班爲子越旣殺班于是矯太后令罪狀謚厲太子立期爲主甲子期僭卽皇帝位玉衡元年正月大赦改元立妻閻氏爲后四月大將軍漢王壽率步騎一萬自涪向成都期不虞至預不設備至師剋城屯兵宮門殺相國建寧王越尙書令景騫尙書曰襄等廢期爲邛都縣公幽之別宮期自殺年二十五謚曰幽公

李壽

李壽字武考特季弟驤之少子少尙禮容敏而好學雄奇其才器以爲足荷重任封爲建寧王雄薨期立

改封漢王領梁州刺史治涪城壽見期兄弟十餘人
并有強兵懼不自全陰謀據成都稱藩於晉乃誓文
武得數千人襲成都剋之縱兵擄掠數日乃定僭卽
皇帝位於南郊大赦改咸康四年爲漢興元年追尊
父驤爲獻皇帝三年六月壽下書曰吳會遺燼久逋
天誅今將大興百萬躬行罰九月大閱軍士七萬餘
人舟師沂江而上過成都鼓譟盈江壽登城觀之羣
臣曰國小衆寡吳會險遠圖之未易叩頭泣諫乃止
其人咸稱萬歲十月講禮於太學舉明經者封好學
侯四年以太子勢領大將軍錄尚書事六年分寧州
乾右永昌雲南朱提越巂河陽六郡爲漢州四月壽
寢疾常見李期爲祟八月薨年四十諡昭文皇帝廟
號中宗葬安昌陵

李勢

李勢字子仁壽之長子身長七尺九寸腰帶十四圍
善于俯仰時人異之壽既薨僭卽帝位大赦改元太
和元年正月尊母閻氏爲皇太后妻季氏爲皇后嘉
寧二年晉征西將軍荊州刺史桓溫來伐勢大發軍
禦之鎮東李位都逆往降溫達成都之十里陌勢衆
自潰三月溫至城下縱火燒其大城門勢衆惶懼無
復固志勢乃夜開東門走九百里至晉壽然後送降
文于溫勢尋輿櫬面縛軍門溫解縛焚櫬送勢及叔
父福戴記云福及弟福等十餘人于建康晉封爲歸義侯升平
五年卒常璩字道將蜀成都人少好學著華陽國志
十篇序開闢以來迄于李勢皆有條理云宕渠古竇
國今有竇城秦始皇時有長人長五丈見宕渠秦史

胡母敬曰五百年其地必有異人爲大人者及雄之
稱尊號祖先出自宕渠有識者皆以爲應之譙周云
我死後三十年當有異人入蜀又著讖云廣漢城北
有大賊曰流曰特攻難得歲在元宮自相剋又惠帝
之世蜀童謠曰江橋頭闕下市成都北門十八字至
是而應焉李特以晉永和元年歲在辛酉起兵至勢
嘉寧二年晉永和三年歲在壬戌而降晉合四十七
年

蜀錄

前涼錄

魏崔鴻撰

張軌

張軌字士彥安定烏氏人漢常山王耳十七世孫祖烈魏外黃令父溫太官令母隴西辛氏軌少好學明經與同郡皇甫士安友善拜太子舍人與京兆杜預以聽注易遣之太康中爲尚書郎太子洗馬中庶子遷散騎常侍征西將軍司馬軌以晉室多難陰圖保據河西追竇融故事筮之遇泰之觀軌喜曰霸者之兆乃求爲涼州公卿亦舉軌拜涼州刺史課農桑拔賢才置崇文祭酒徵九郡胄子五百人立學校以教之永興二年拜西安將軍封樂鄉侯惠帝崩遣長史北宮純司馬纂別駕陰監奉表京師是歲大城姑臧

其城本匈奴所築也南北七里東西三里地有龍形故名臥龍城永嘉四年十一月黃龍出於臨羌河發水昇天身長十餘丈五年帝遣使拜車騎大將軍開府儀同三司策命未至而劉曜攻陷長安遷晉帝于平陽建興元年晉愍帝卽位于長安遣使者拜軌鎮西大將軍開府儀同三司加侍中封西平郡公固讓不受二年進拜太尉涼州牧以軌年老多疾拜子宴行撫軍副涼州刺史五月軌寢疾立子宴爲世子己丑薨于正寢年六十葬建陵冊贈侍中太尉諡武穆張祚僭號追尊武王廟號太宗

張宴

張宴字安遜軌之世子也學尙明察敬賢愛士晉舉秀才除尙書郎永嘉元年固辭驍騎將軍請還涼州

帝許之改授議郎西中郎將建興元年長史張璽等表宴嗣位十月帝遣使受西中郎將涼州刺史西平公二年十一月帝將降劉曜進宴侍中司空涼州牧三年始知劉曜逼遷天子平陽大臨三日五年南陽王寶聞愍帝崩自稱晉王年號建康置百官遣使拜宴征西大將軍開府儀同三司增邑三千戶六年六月京兆人劉宏挾左道以眩惑百姓密與宴左右十餘人謀殺宴皆懷刀入內斬宴于外寢時年五十葬寧陵晉王寶冊贈宴大司馬涼州牧謚元公張祚僭號追尊曰明王廟號高祖母弟茂嗣以宴子幼嗣茂茂字成遜宴之母弟虛靖好學不以勢利爲心建興元年相國南陽王寶辟從事中郎又薦爲給事黃門侍郎皆不就二年徵爲侍中又以疾固辭四年拜秦

州刺史加散騎常侍領雍州皆不受宴左司馬陰元
年以宴既被害子駿冲幼宜立長君乃推茂為大都
督太尉涼州牧茂不從以平西將軍行都督涼州諸
軍事護羌校尉涼州牧西平公大赦境內九月立宴
子駿為世子三年劉曜遣鴻臚拜茂太師涼王四年
茂寢疾執駿手泣曰吾先人以孝友見稱自漢以來
世執忠順汝謹守忠節毋或失墮薨于正寢年四十
八劉曜遣使贈太宰諡成烈王張祚僭號追尊曰成
王廟號太宗

張駿

張駿字公庭宴之世子永嘉元年生幼而奇偉十歲
能屬文茂之四年拜使持節大都督大將軍涼州牧
西平公大赦境內劉曜遣使拜大將軍涼州牧元年

正月親耕籍田二月始承晉元帝崩問大臨三日四年十二月劉曜爲賊所擒曜太子毗及劉胤等率衆奔上邽六年二月石勒稱天王遣使拜駿征西大將軍涼州牧加五錫之禮八年羣寮勸駿稱涼王置百官駿曰此非人臣所言敢有此言罪在不赦又請立世子乃立重華爲世子十二月鄯善王元禮獻女姝好號曰美人立賓遐觀以處之十四年五月雨雪降霜駿避正殿素服命羣寮極言得失十五年以右長史任處領國子祭酒立辟雍明堂而行禮焉命西曹掾集閣內外事付索綏以著涼春秋十一月以世子重華行涼州事十九年田于建西踰玉右縣九月改玉右縣爲金澤縣二十一年始置百官官號皆擬天朝車服旌旗一如王者酒泉太守馬岌上言酒泉南

山既崑崙之體周穆王見西王母樂而忘歸卽謂此山有石室玉堂珠璣鏤飾煥若神宮禹貢崑崙在臨江之西卽此明矣宜立西王母祠以裨朝廷無疆之福駿從之二十二年六月薨于正德前殿年四十晉遣策贈大司馬諡忠成公七月葬大陵張祚僭號追尊文王廟號世祖

張重華

張重華字泰臨駿第二子寬和懿重沉毅少言駿薨右長史任處上華爲使持節大都督太尉涼州牧護羌校尉西平公假涼王大赦境內三年九月晉遣使者拜侍中大都督隴右諸軍事大將軍涼州刺史領護羌校尉西平公重華以位號未稱怒不受詔羣寮上重華爲丞相涼王雍秦涼三州牧五年重華讌羣

寮于閑豫庭論講經義顧問索綏曰孔子婦誰家女
老聃父字爲何四皓旣安太子仕乎還山乎綏曰孔
子婦姓开官氏老聃父名乾字元杲胎剛無耳一目
不明孤單年七十二無妻與鄰人益壽氏老女野合
懷胎八十年乃生老子四皓還否臣尙未悉重華曰
卿不知乎四皓死于長安有四皓冢爲不還山也七
年十月重華寢疾臨春坊遣左長史馬岌策拜子靈
曜爲世子大赦境內十一月薨于平章殿年二十七
葬顯陵張祚僭號追諡桓王廟號世祖

張祚

張祚字太伯駿之長庶子博學雄武有政治之才駿
之二十一年拜延興太守封寧侯重華薨子靈曜嗣
七年十一月右長史趙長等矯稱遺令以祚爲使持

節都督中外諸軍事撫軍大將軍輔政十二月趙長
等議以靈曜冲幼世難未夷宜立長君廢曜爲寧涼
侯立祚爲大將軍護羌校尉涼州牧趙長等議僭卽
王位于謙光殿大赦改元爲和平元年立妻辛氏爲
皇后子太和爲太子封弟天錫爲長寧侯重華少子
元靖爲涼武侯置百官二月尊祖父郊祀天地二年
有神降于元武殿自稱元冥與人交語祚日夜祈之
神言語福利祚甚信之征東張瓘遣兵傳檄廢祚還
第復立靈曜八月祚收瓘弟琚及其子嵩等驍騎將
軍宋混兄脩素與祚有隙大懼祚疑之混西奔招合
夷晉衆至萬餘人還向姑臧祚遣陽秋胡將靈曜于
苑拉音獵其腰而殺之埋于沙坑九月宋混次于武始
大澤爲靈曜發哀閏月混至姑臧祚登神雀觀張琚

張嵩煞祚守卒死者四百餘人斬西門關納混領軍
趙長開宮門以應琚長馳入殿中大呼稱萬歲祚以
長敗賊下觀勞之長奮槊音朔刺祚中額奔入萬秋閣
爲廚士徐里所殺以庶人禮葬之天錫卽位備禮改
葬于愍陵追諡威王封子廷堅爲金澤侯

張元靖

張元靖字元安重華少子母郭夫人和平二年宋混
張琚等上元靖爲大將軍涼州牧護羌校尉西平公
時年七歲張瓘至姑臧推元靖爲大將軍涼王自爲
使持節都督中外諸軍事尙書令涼州牧張掖郡公
四年五月東苑大冢上忽有地東天澤地燃廣袤數
丈執法御史杜逸言于瓘曰此皆變之大者可移之
族瓘徵兵數萬集于姑臧謀討宋氏混與弟澄及左

右壯士楊和等四十餘騎奔入南門申令諸營曰張
瓘得罪被太后詔誅之俄而衆至二千擁瓘率衆出
戰混擊敗之衆悉去瓘自殺混入見元靖以混爲使
持節中外都督諸軍事驃騎大將軍酒泉郡侯輔政
五年六月大旱令諸祈雨之官皆詠雲漢詩儒林祭
酒索綏曰雲漢陳周宣之美非旱之文昔神鼎之出
漢虞丘不賀今辭與事違恐非致澤之意也綏字士
艾燉煌人父戢晉司徒綏家貧好學舉孝廉爲記室
祭酒母喪去官又舉秀才著涼春秋五十卷又作六
夷頌符命傳十餘篇以著述之功封平樂亭侯六年
宋混卒天錫以使持節都督諸軍輔政八月右將軍
齊南等議以靖多難務須立長君勸天錫自立閏月
天錫遣肅等夜害元靖時年十四葬平陵諡沖王

張天錫

張天錫字公純，馱駿之少子，母曰劉美人。元靖卽位，一十八，謁于太廟，尊母劉氏爲太后。元年四月，秦遣鴻臚回國，拜天錫大將軍，涼州牧，西平公。三年，姑臧北山楊樹生松葉，西苑牝鹿生角，東苑銅佛生毛，延興地震，陷裂水出。天錫避正殿，引咎責謝。晉遣使拜右關中諸軍大將軍，涼州牧，西平公。八年，郡國火，燃于泥中，三十所。苻堅復有兼并之規，天錫大懼，遣從事中郎韓博奉表于晉，又與桓溫書，尅其年大舉都會。上邽十年，以世子懷爲使，持節鎮西將軍，高昌郡公。次子大豫爲世子，豫母焦氏爲左夫人。七月，大水地震，西平五十日，中地十動，土樓崩。天錫疾，美人閻姬、薛姬皆自殺。二姬因色並有殊寵，天錫每謂之曰

汝二人將何以報我我死之後豈可更爲人妻皆曰
尊若不諱妾請効死于前灑掃於地下無他志十月
天錫疾瘳大赦境內追悼二姬葬以夫人禮十三年
五月苻堅遣武衛將軍句長等率衆來伐天錫遣中
衛將軍史景等拒戰赤岸爲秦所敗天錫納左長馬
芮之言面縛降秦東徙長安拜歸義侯北部尙書遷
右僕射隨苻堅敗于淮南又昔爲員外散騎常侍復
本封薨贈鎮西將軍諡悼公張軌以晉永寧九月辛
巳歲牧涼州至天錫敗亡之歲歲在丙午八主七十
六年

前涼錄

西涼錄

魏崔鴻撰

李暲

李暲字元盛隴西狄道人也漢前將軍廣十六世孫
廣子侍中敢之後李氏世爲西州著姓祖父弇前涼
武衛將軍天水郡太守安世亭侯父昶字中堅幼有
令名世子侍講年十八卒暲昶之遺腹子少而好學
沈敏有器度後涼龍飛二年建康太守段業自稱涼
州牧號神璽元年拜暲效穀令二年燉煌索仙等以
暲溫毅有惠政推暲爲燉煌太守段業復暲鎮西將
軍領護西夷校尉庚子元年十一月晉昌太守唐瑤
移檄六郡推暲爲大將軍涼公領秦涼二州牧大赦
改年追尊祖弇涼公父昶涼簡公以瑤爲征東將軍

二年正月于南門起靜恭堂以議朝政圖讚自古聖
帝明王忠臣孝子烈士貞女親爲序頌以作鑒戒五
年正月立泮宮增高門學生四百人四月燉煌有葛
緣木而生作黃鳥之形世子譚卒九月立第二子歆
爲世子正月大赦改元爲建初元年三月讌于曲水
命羣寮賦詩曷親爲之敘文寫諸葛亮訓厲以戒諸
子十三年正月寢疾顧命長史宋繇曰吾終之後嗣
子猶卿子也善相輔導二年薨于恭德殿年六十葬
建世陵謚昭武王廟號太祖初曷爲羣雄所推定千
里之地謂張氏之業不足成河西十郡歲月而一旣
而僂檀入姑臧蒙遜基宇稍廣於是慨然著述志賦
初河右不生楸槐張駿之世取秦隴植之皆死至是
而酒泉言西北有槐生焉乃作槐樹賦又作婦辛氏

誅其餘賦數十篇

李歆

李歆字士業，曷第二子。曷薨，左長史宋繇等上爲大將軍涼公，領涼州牧，護羌校尉，大赦改年爲嘉興。元年七月，歆聞蒙遜南伐西秦，中外戒嚴，將攻張掖。尹太后以爲不可，宋繇亦諫，歆怒不從，遂率步騎三萬東伐。次于都瀆，澗蒙遜自浩亶來戰于懷城，歆敗。左右勸還，歆曰：「吾違太后明誨，遠取敗辱，不殺此胡，復何面目以見母也！」勒衆復戰，敗于蓼泉，爲遜所殺。歆弟驍，騎將軍，翻擊虜將軍豫等西奔。燉煌蒙遜遂入酒泉，翻及燉煌太守恂與諸子等棄燉煌，奔于北山。郡人朱承、張宏等以恂在郡有惠，密信招恂。恂率千騎入于燉煌，朱承、張宏等推恂爲涼州刺史。遜率衆

二萬攻恂朱承等開門出降恂自殺恂暱之第六子也遜復翻子寶徙于姑臧歲餘北奔伊吾後二十餘年至魏太平三年寶至伊吾率流人反虜騎南襲燉煌據之遣使降魏魏以寶爲使持節侍中都督西郵諸軍事鎮西大將軍開府儀同三司領護戎校尉沙州牧燉煌公承制玉門以西寶寬雅有度量甚著威惠于西土在燉煌三年徙并州刺史薨諡宣公自暱元年歲在庚子至爲蒙遜所滅二十一年

西涼錄

北涼錄

魏崔鴻撰

沮渠蒙遜

沮渠蒙遜臨松盧水胡人其先世爲匈奴左沮渠遂以官爲氏遜好學涉羣史雄烈有英略後龍飛二年遜伯父羅仇麴粥從呂光征河南光前軍大敗皆爲呂光所殺宗部會葬者萬餘人遜哭謂衆曰昔漢祚中微吾之乃祖翼獎寶融保寧河右呂王耄荒虐民無道豈可坐觀成敗不上繼先祖安民之志下使二父有恨黃泉衆咸稱萬歲遂立盟約一旬之間衆至萬餘與從兄男成推光建康太守段業爲涼州牧康公改龍飛二年爲神璽元年業以遜爲張掖太守男成爲輔國大將軍委以軍國之任永安元年三月遜

以爲業所憚內不自安請爲安西太守四月業收男
成賜死遜聞男成死泣告衆曰男成忠于段公枉見
屠害諸軍能爲報仇乎成素自恩信衆皆憤泣而從
之比至氏池衆踰一萬業遣右將軍田昂武衛將軍
梁中庸等攻侯塢遜自氏池救之昂率騎五百歸遜
軍遂大潰中庸來奔五月遜至張掖田昂兄子承愛
斬關納遜業左右散走遜大呼曰鎮西何在軍人曰
在此業曰孤單飄一己爲貴門所推可見乞餘命投
身嶺南庶得東遷與妻子相見遜遂斬之六月右長
史梁中庸等推遜爲大將軍梁州牧大赦改元永安
四年秦鴻臚梁裴拜遜鎮西大將軍開府儀同三司
沙州牧西海公九年二月兩月竝出正始元年冬十
月遷都姑臧十月僭卽河西王位于謙光殿大赦改

元置百官始如呂光爲三河王故事二年四月立子德政爲世子三年二月與西秦通和遜西巡遂循海至鹽池祀王母等寺中有元石圖命中書侍郎張穆爲賦銘于寺前十四年起遊林堂于內苑圖列古聖賢之像九月堂成遂讌羣臣談論經傳顧謂郎中劉炳曰仲尼何如人也炳曰聖人也遜曰聖人者不凝滯于物而能與世推移畏于匡辱于陳伐樹削跡聖人固若是乎炳不能對遜曰卿知其外未知其內昔魯人有浮海而失津者至于亶州仲尼及七十二子遊于海中與魯人木杖令閉目乘之使歸告魯侯築城以備寇魯人出海投杖水中乃龍也具以狀告魯侯不信俄而有羣鷲數萬啣土培城魯侯信之大城曲阜訖而齊寇至攻魯不剋而還此其所以稱聖也

義和元年十二月魏遣太常李慎拜遜太傅涼州牧涼王加九錫之禮三年夏四月遜寢疾立子茂虔爲世子薨于路寢五月葬元陵諡武宣王廟號太祖然沮渠茂虔遜第三子聰穎好學和雅有度義和三年立爲世子加中外都督大將軍錄尚書遜薨僭卽河西王位大赦改年爲永和元年立子封疆爲世子加撫軍大將軍錄尚書事三年五月西中郎將燉煌太守沮渠唐兒上言曰十五日有一老父見于郡城東門投書忽然不見其書一紙八字滿之文曰涼王三十年若七年虔訪于奉常張慎曰昔號將亡神降于莘深願陛下剋念脩政以副三十年之慶若盤于遊田荒于酒色臣恐七年將有大變虔不悅七年正月朝羣臣于謙光殿有狐在于東序門首不見其入左

右以告禽之不獲二月端門崩初虔爲酒泉太守起
浮屠于中街有石象在焉是月日流血五月太廟基
陷六月當陽門崩魏常山王赤堅率衆至姑臧虔嬰
城拒守九月面縛出降魏釋其縛徙虔及宗室士民
十萬戶于平城拜虔征西大將軍王如故八年賜死
諡哀王自遜永安元年歲在辛丑至是歲庚寅三十
九載

北涼錄

三十二年四月...

武宣王...

三子...

大將軍...

立子...

武宣王...

安元...

天...

宗...

...

...

...

後涼錄

魏崔鴻撰

呂光

呂光字世明洛陽人其先自沛遷洛陽因家焉世爲
氐酋父婆樓字廣平佐命前秦官至太尉光以趙建
武中生于枋頭夜有神光之異故名焉年十歲與諸
兒童遊戲邑里爲戰陣之法童兒咸推爲主光身長
八尺四寸目重瞳子左肘有肉印沉毅凝重寬簡有
大量人莫之知唯王猛異之曰此非常人言之苻堅
舉賢良除美陽令民夷憚愛隣境肅清遷鷹揚將軍
以功賜爵關內侯建元十九年以光爲使持節都督
西討諸軍事率將軍羌飛彭晃杜進康隆等率步騎
七萬討西域十二月至龜茲龜茲王帛純捍命不降

光軍其城南五里爲一營深渠高壘廣設疑兵爲木
人被甲羅之壘上以爲持久之計二十年五月帛純
乃傾國財寶請救于獯胡王遣弟唵龍侯將馘率騎
二十餘萬救之胡便弓馬善矛槊鎧如連鑠射不可
入乃以革索縶策馬擲人多有中者衆甚憚之姑默
宿尉頭等國及諸胡內外七十萬人光遷營相接陣
爲勾鑠之法精騎爲遊軍彌逢其闕秋七月戰于城
西大敗之帛純逃奔王侯降者三十餘國進入其城
城有三重廣輪與長安城等城中塔廟千數帛純宮
室壯麗煥若神居胡人奢侈富于生養家有蒲萄酒
至千斛經十年不敗士卒淪沒酒贓者相繼諸國貢
款屬路立帛純弟震爲王以安之光撫寧西域威恩
甚著秦以光爲使持節散騎常侍都督玉門巴西諸

軍事安西將軍西域校尉進封順鄉侯二十一年正月大饗文武博議進止衆咸請還光從之三月引還以駝二萬餘頭致外國珍異千餘品駿馬萬餘匹而還九月光入姑臧自領涼州刺史護西校尉太安元年苻丕以光爲車騎大將軍梁州牧領護西域大都督酒泉公光始聞苻堅爲姚萇所害奮袂哀怒三軍縞素大臨于城南傳檄諸州期孟冬大舉諡堅爲文昭皇帝十月大赦境內改建元爲太安十一月羣寮勸進曰長蛇未殄方掃國難宜進位元台十二月上光爲侍中中外都督隴右諸軍大將軍涼州牧酒泉公三年八月甘露降逍遙園白鷺翔于酒泉衆鷺成列而從之麟嘉元年正月麟見金澤縣百獸從之于是羣寮奉表請崇進名號二月僭卽王位于南郊大

赦改元置官司丞郎以下猶攝州縣事三年九月太廟新成追尊父爲景昭王祖爲宣公曾祖爲恭公高祖爲敬公龍飛元年五龍見于浩豐羣臣咸賀勸光稱號六月僭卽天王位于南郊大赦改年備置羣司立世子紹爲太子四年九月光寢疾十二月疾甚立太子紹爲天王光自號太上皇帝以子纂爲太尉宏爲司徒詔曰吾疾病不濟吾終之後使纂統六軍宏管朝政汝恭己無爲委重二兄庶可以濟今外有強寇民心未寧汝兄弟輯睦貽厥萬世若內相圖則禍不旋踵纂宏泣曰不敢有二心薨葬高陵諡武皇帝廟號太祖

呂纂

呂纂字永緒光之長庶子母趙淑媛少便弓馬好書

太安元年至于姑臧光臨薨執手戒之曰汝性麤武
深爲吾憂開基旣難守成不易善輔永業勿聽讒言
光薨紹祕不發喪纂排閣入哭盡哀而出紹懼以位
讓之曰兄功高年長宜承大統纂曰臣雖長陛下國
家之適不可以私愛而亂大倫驍騎呂超謂紹曰纂
臨喪不哀步高視遠觀其舉止恐成大變宜早除之
纂聞超謀遂率壯士數百踰北城攻廣夏門入自青
角門昇謙光殿紹登紫閣自殺呂超出奔廣武纂遂
僭天王大赦改龍飛四年爲咸寧元年諡紹隱王纂
遊田無度荒耽酒色常與左右因醉馳獵于坑澗之
間殿中侍御史王回扣馬諫不納番采太守呂超擅
伐鮮卑思盤思盤訴超于纂纂召超入朝怒曰卿恃
兄弟桓桓欲欺吾也要當殺卿然後天下可定超頓

首曰不敢纂引諸臣宴于內殿呂隆屢勸纂酒已至昏醉乘步輓車將超等遊于內至琨華堂東閣超取劍擊纂纂下車擒超超刺纂洞胸奔于宣德堂將軍魏益入斬纂首以徇隆既篡位諡靈帝葬白石陵

呂隆

呂隆字永基光弟寶之子既殺纂遂僭卽王位大赦改咸寧三年爲神鼎元年二月追尊父寶爲文皇帝超有佐命之勳拜爲侍中都督中外諸軍事輔國大將軍錄尚書封安定公二年秦遣鴻臚恒敦拜隆征北大將軍都督河西諸軍涼州牧建康公三年隆以二涼之逼遣齎珍寶請迎于秦遣尚書左僕射齊難率步騎四萬來迎隆率戶一萬隨難東遷既至長安秦以隆爲散騎常侍尚書公如故超爲安定太守其

後坐與姚興少子廣平公弼謀反誅呂光以乙酉歲
據涼州至于是歲歲在癸卯凡一十九年

後涼錄

後燕錄

魏崔鴻撰

慕容垂

慕容垂字道明皝第五子小字阿六敦母蘭淑儀垂
少有器度長七尺七寸手垂過膝皝甚寵之常曰此
兒闊達好奇終能破人家或能成人家故名霸字道
業因墜馬傷前二齒慕容雋卽王位因改名缺外以
慕容缺爲名內惡而改之尋以讖記之文去夬以垂
爲名及雋僭稱尊號封吳王建熙十年以車騎大將
軍敗桓温于枋頭威名大震太傅上庸王評深忌之
垂遂出奔秦苻堅聞垂至大悅郊迎執手禮之甚重
王猛惡垂雄略勸堅殺之堅不從以爲冠軍將軍封
賓都侯歷京兆尹苻堅敗于淮南垂軍獨全堅以千

餘騎奔之世子寶言于垂曰國家傾嚳皇綱廢弛當
隆中興之業建少康之功宜恭承皇天之意因而取
之垂曰彼悉心投命若何害之乃以兵屬堅垂至澠
池言于堅曰王師不利壯境之民或因此輕重請奉
詔輯寧朔裔且龍鄴舊都陵廟所在乞過展拜以申
罔極堅許之權翼諫曰垂爪牙名將今之韓白且世
豪東夏志不爲人下頃以避禍歸誠非慕德而至也
恐冠軍之號不飽其志列地百里未滿其心且垂猶
鷹也飢則附人飽便高颺遇風塵之會必有凌霄之
志堅曰卿言是也但朕已許之匹夫猶重信況萬乘
之主乎翼曰陛下重小信而輕忽社稷臣見往不見
其還關東之變垂其首乎自涼馬臺結草筏而渡至
安陽修箋于長樂公不垂至館之于鄴西會苻暉告

丁零翟斌聚衆四千謀逼洛陽丕于是配垂兵二千遣廣武將軍苻飛龍率氏騎一千爲垂之副丕戒飛龍曰垂爲三軍之統卿爲垂謀之主苻暉告急簡書相尋垂方圖飛龍停河內不進悉誅氏兵命左右殺飛龍濟河焚橋衆三萬至洛陽苻暉閉關門拒守不與交通翟斌率衆會垂勸稱尊號垂曰新興侯國之正統孤之君也若以諸軍之力得平關東當以大義喻秦奉迎反正誣上自尊非孤心也乃自稱大將軍燕王承制行事翟斌爲建義將軍封河南王弟德爲范陽王衆至二十萬濟自石門長驅攻鄴元年正月朝羣寮于清陽宮以暉在長安依晉愍帝在平陽中宗稱王改年建武故事改秦建元爲燕元元年立太子寶爲燕太子攻拔鄴郡不固守中城垂漸而圍之

于魏郡肥鄉築新興以置輜重進師攻鄴開其西奔之路二年三月丕棄鄴奔并州以魯陽王和爲南中郎將鎮鄴十二年垂定都中山建興元年正月羣寮勸垂正尊號辛卯僭卽皇帝位于南郊大赦改元建興立子寶爲皇太子十年五月太子寶率衆八萬伐魏范陽王德爲之後繼魏聞寶將至徙于河西寶臨河不敢濟引師還次于參合俄而魏軍大至三軍奔潰寶與德等數千騎奔免十一年三月垂大衆出參合太子寶出天門垂至參合見積骸如山設祭弔之死者父兄各皆號哭軍哀慟垂慚憤嘔血因而寢疾築燕昌城而還寶等至雲中聞垂疾皆引歸及垂于平城夏四月薨于上谷之俎陽年七十二諡武成皇帝廟號世祖

慕容寶

慕容寶字道祐垂第四子元璽四年生于信都少輕
果無志操好人從己段后諫垂曰太子資質雍容柔
而不斷非濟世之雄遼西高陽陛下嗣之賢者宜擇
一樹之垂不納謂曰汝謂我爲晉獻公乎建興十一
年四月僭卽皇帝位大赦改元爲永康元年寶遣將
軍趙王麟逼段后曰常謂主上不能嗣守大統今竟
能不宜早自裁以全段氏后怒曰汝兄弟上逼殺母
豈能保守社稷吾豈惜死念國滅不久遂自殺八月
立妃段氏爲皇后濮陽公榮爲皇太子二年正月魏
使修和寶不許二月魏攻中山其夜尙書慕容皓謀
殺寶立趙王麟寶與太子榮等萬騎就清河會于薊
以開封公慕容詳守中山五月中山饑麟出據新市

魏師戰于義臺敗績南奔魏入中山寶遣御史中丞兼鴻臚魯遂持節受司空范陽王德丞相冀州牧承制南夏封公封侯牧守三年二月寶發龍城以撫軍慕容騰爲前軍步騎三萬將南伐次于乙連長上段速骨宋赤眉因民之憚遠役殺司空樂浪王宙衆旣幸亂投杖奔走寶馳還龍城又與長樂王盛等南奔尙書蘭汗殺速骨等十餘人奉太子榮承制大赦遣迎寶還于薊寶欲北還盛等咸以汗忠款虛寶未明宜就范陽王德寶從之乃自薊而南四月寶至鄴鄴中遺民固請留之寶不從南至黎陽城西聞范陽王德稱制懼而退乃還龍城次于廣都蘭汗又遣左將軍蘇超寶具申款誠忠節無差寶于是命發汗遣弟難率五百騎迎寶至龍城汗引寶入于外邸殺之年

四十四殺太子榮及王公卿士百餘人汗自稱大將軍大單于昌黎王年號青龍七月長樂公盛襲誅汗盛卽位僞諡寶惠愍皇帝廟號烈祖

慕容盛

慕容盛字道運寶之庶長子秦建元十年生于長安二十年苻堅誅慕容氏盛東奔既至垂問以西事畫地圖垂笑謂之曰昔魏武撫明帝之首遂乃侯之祖之愛孫有由來矣于是封長樂公建興六年領北中郎鎮薊進爵爲王及寶爲蘭汗所殺盛馳訃哀因潛結大衆謀討難及汗等斬之建平元年七月告成宗廟大赦改元青龍謙損自卑不稱尊號以長樂王稱制諸王貶爵爲公東陽公慕容根等九十八人上尊號盛不許十月根等又請盛許之丙子僭卽皇帝位

正月朝羣臣於承乾殿大赦改建平元年爲長樂元年二年正月大赦盛去皇帝之號稱庶民天王三年八月右將軍慕容國謀率禁兵襲盛前將軍段機等因衆心阻動潛于禁中鼓譟大呼盛聞變率左右出戰衆皆披潰俄有一賊從闇中擊傷足遂取輦昇前殿召叔公河間公熙囑以後事熙未至而薨年二十九僞諡昭武皇帝廟號中宗

慕容熙

慕容熙字道文一名長生垂之少子燕元二年生于長生建興八年封河間王永康初隨寶奔龍城拜司隸校尉長樂元年遷僕射中外都督領昌黎尹盛薨僭卽皇帝位大赦改長樂三年爲光始元年二年正月熙引見州郡耆舊予言問以民間疾苦司隸部民

劉瓚對問稱旨拜帶方太守是春大治宮室至四月立苻貴人爲昭儀五月築龍騰苑廣十里餘役徒二萬起景雲山于苑內又起逍遙宮甘露殿連房數百觀閣相交鑿天河渠引水入宮又爲苻昭儀鑿曲光海青涼池季夏暑熱士卒不得休息渴死者大半四年二月昭儀苻氏卒立苻貴嬪爲皇后九月苻后遊畋熙從之北登白鹿山東過青嶺南臨滄海冬十一月乃還百姓苦之士卒爲狼虎所害及凍死者五千餘人五年十月擬鄴之鳳陽作弘光門累級三層建始元年正月大赦天下三月太史丞梁延年夢月化爲五白龍夢中占之曰月臣也龍君也月化爲龍當有臣爲君寤而告人曰國符其將盡乎是月苻后起承華殿高弘光一倍負土於北門土與穀同價典軍

杜靜載棺詣闕上書諫大怒斬之后嘗季夏思凍魚
鱸冬須生地黃皆下有司切責不得加以大辟四月
苻后崩熙悲號躄踊若喪考妣擁其尸而撫之曰體
已就冷命遂斷矣于是僵仆絕息久而乃蘇服斬纒
食粥百寮于宮內設位哭臨使有司按校哭者有淚
以爲忠孝無淚則加罪羣臣震懼莫不含辛以爲淚
高陽王妃張氏熙之嫂也美姿容熙欲以爲殉乃毀
其襪韠中有弊氈遂賜死三女叩頭求哀熙弗許營
陵周輪數里下涸三泉內圖畫尙書八座之像熙曰
善爲之朕將隨后入此陵轎車高大毀北門而出中
衛將軍馮跋左衛將軍張興先皆坐事亡奔以熙政
之虐也與跋從兄萬泥等三十二人結盟推夕陽公
慕容雲爲主發尙方徒五千人分屯四門入宮授甲

閉門拒守中黃門趙洛生奔告熙熙曰此鼠盜耳勝
還當誅之乃收髮貫甲馳還赴難夜至龍城攻北門
不剋遂入龍騰苑左右潰散熙微服逃于林中爲人
執送雲等殺之年三十二葬衡平陵諡曰昭文皇帝

慕容雲

慕容雲字子雨寶之養子祖父高和句麗之支庶自
云高陽氏之苗裔故以高爲氏寶之爲太子雲以武
藝給侍東宮永康初拜侍御郎以疾去官及熙葬后
馮跋詣之告以大謀雲懼跋等強之四月卽天王位
復姓高氏大赦改建始元年爲正始元年國仍號大
燕以馮跋爲侍中都督中外諸軍錄尙書事武邑公
慕容歸爲遼東公立燕之宗社三年冬十月雲臨東
堂幸臣離班桃仁懷劍執紙而入稱有所啓抽劍擊

南涼錄

魏崔鴻撰

秃髮烏孤

秃髮烏孤河西鮮卑人也八世祖疋孤率其部自塞北遷於河西孤子壽闐立壽闐卒孫樹機能立壯果多謀略太始中殺秦州刺史胡烈於萬斛堆敗涼州刺史蘇榆於金山又殺涼州刺史楊欣於舟嶺盡有涼州之地武帝爲之旰食能死從弟務丸代立丸死孫推斤立斤死子思復鞬立部衆轉盛遂據涼土鞬卒子烏孤襲位養民務農修結鄰好呂光封烏孤廣武郡公益州牧左賢王太初元年正月改元自稱大將軍大單于西平王以弟鹿孤爲驃騎將軍儻檀爲車騎將軍二年改稱武威王三年正月徙于樂都八

月孤因酒走馬馬倒傷脇笑曰幾使呂光父子大喜
俄而患甚顧謂羣臣曰方難未靖宜立長君言終而
薨在王位三年僞諡武王廟號烈祖

利鹿孤

利鹿孤烏孤弟太初三年八月卽位大赦改治西平
建和元年正月大赦改年延耆老訪政二年羣臣固
請卽尊號不許九月僭稱河西王三年三月寢疾令
曰昔我諸兄弟傳位非子者蓋以泰伯三讓周道以
興故也武王創踐賓歷垂諸樊之試終能克昌家業
者其在車騎乎吾寢疾憊願是將不濟內外多虞國
機務廣其令車騎經惣百揆以成先王之志薨諡康
王葬西平陵

傳檀利

僂檀利鹿孤弟也少機警有才略建和三年襲位僭號涼王遷於樂都改爲宏昌元年秦遣使拜車騎將軍廣武公四年六月秦遣河右諸軍事涼州刺史鎮姑臧七月讌羣臣於宣德堂仰視而歎曰古人言作者不居居者不作信矣前昌松太守孟禕進曰張文王築城苑繕宗廟構此堂爲貽厥之資萬世之業秦師濟河然後瓦解此堂之建年垂百載十有二主唯信順可以久安仁義可以永固願大王勉之檀曰非君無以聞讜言也八月以鎮南大將軍文支鎮姑臧檀遷於樂都雖受制于秦車服禮制一如王也十一月遷於姑臧嘉平元年十一月僭卽涼王位於南郊大赦改年嘉平置百官立世子虎臺爲太子二年正月以子明德歸南中郎將領昌松太守歸雋爽聰悟

檀甚寵之年始十三命爲昌高殿賦援筆卽成影不移漏檀覽而善之擬之曹子建七年僂檀議欲征西乙弗孟愷諫曰連年不收上下饑弊南逼熾盤北迫蒙遜今遠征雖剋後患必深僂檀曰孤將略地卿無阻衆謂其太子虎臺曰今不種多年內外俱窘事宜西行以拯此弊蒙遜近去不能卒來旦夕所慮唯在熾盤彼名微衆寡易以討禦吾不過一月自足周旋汝謹守樂都無使失墜僂檀乃率騎七千西襲乙弗大破之獲牛馬羊四十餘萬熾盤乘虛來襲旦而城潰安西樊泥自西平奔告僂檀謂衆曰今樂都爲熾盤所陷卿等能與吾籍乙弗之資取契汗以贖妻子者是所望也遂引師而西衆多逃返遣征段苟追之苟亦不還於是將士皆散僂檀曰蒙遜熾盤昔皆委

質於吾今而歸之不亦鄙乎四海之廣匹夫無容其
身何其痛哉吾老矣寧見妻子而死遂歸熾盤六月
至西平盤遣使郊迎以上賓之禮歲餘爲熾盤所鳩
諡景王時年五十一虎臺亦爲熾盤所害少子保周
歸魏魏以爲張掖王自烏孤太初元年歲在丁酉至
檀薨之歲十有八歲

南涼錄

南燕錄

魏崔鴻撰

慕容德

慕容德字元明皝之少子皝每對諸宮人言婦人妊
娠夢日入懷必生天子公孫夫人方妊夢日入臍中
獨善而不敢言晉咸康二年晝寢生德左右以告方
寢而起皝曰此兒易生似鄭莊公長必有大德遂以
德爲名年十二而皝薨哀毀過禮年十八長八尺二
寸額上有日角偃月重文元璽初封梁公建熙初進
號安北將軍封范陽王入爲魏尹秦滅燕徙於長安
秦伐涼德請征自効後爲張掖太守苻堅伐晉垂請
德爲副堅敗德乃隨垂如鄴垂稱燕王復封范陽王
建興元年爲司隸校尉八年司徒垂臨薨謂太子寶

曰鄴是舊都宜委范陽王永康元年以德鎮鄴及寶
失中山自龍城奔鄴以德爲丞相領冀州牧承制南
夏德兄子麟自義臺來奔因說德曰中山旣沒魏必
乘勝攻鄴雖糧儲素積而城大難固且人情沮動不
可以戰及魏軍未至擁衆南渡就魯陽王和據滑臺
而聚兵積穀伺隙而動計之上也魏雖拔中山勢不
久留不過驅掠而返人不樂徙理自生變然後振威
以拔之魏則內外受敵使戀舊之士有所依憑廣開
恩信招集遺黎可一舉而取之先是慕容和亦勸德
南徙於是許之隆安元年正月德率戶四萬三千車
二萬七千乘自鄴徙滑臺黎陽魏軍垂至三軍危懼
欲堡據黎陽昏日流澌冰合是夜濟訖冰亦尋消德
大悅改黎陽津爲天子津德入滑臺趙王麟等九十

八人上言今中土傾陷龍都蕭條趙魏遺黎鵠企澤
臯伏願仰承俯順以承宗廟謹上皇帝尊號德許之
令曰假順來議且以燕元故事統符行帝制奏詔而
已改永康三年爲元年大赦殊死已下置百官封進
有差寶自龍城南奔至黎陽城西數里伏於河西遣
中黃門趙思告北地王鍾曰上以去二月得丞相表
卽自南征段速骨作逆於乙連今失據來此呼丞相
奏迎鍾馳使白狀寶遣思之後見採樵者知德稱帝
懼而北奔初苻登旣滅登弟廣率所部二千來降拜
冠軍處之乞活堡至是復叛稱秦王德留撫軍曾陽
王和守滑臺德率衆攻廣斬之和長史季辨殺和以
滑臺降魏德曰苻廣雖平撫軍失據進有強敵退無
所托計將安出尙書潘聰曰滑臺四通八達非帝王

之居青齊沃壤號曰東秦地方二千里戶餘十萬四塞之固可謂用武之國德猶預未決於是遣牙門蘇撫問沙門朗公報曰山西絕俗之士不應預聞朝議但有待之累非有託無以立陛下今來卽朗之檀越敬覽潘尙書之議可謂興邦之術矣撫又問以年世朗以周易筮之曰燕衰庚戌撫曰幾何曰年則一紀世則及子撫曰何其促乎朗曰卦兆然也豈關人哉撫不敢言德大悅三月德引師而南五月次薛城八月入廣固卽皇帝位於南郊大赦改元爲建平元年又曰漢宣憫吏民犯諱故改名朕今增一備字以爲復名庶開臣子避諱之路於是敘賞有差新舊咸悅十月太極端門並就以公工張剛爲材官將軍上方令二年十月徐州刺史潘聰青州刺史鞠仲來朝讌

於延賢堂酒酣德笑謂羣臣曰朕雖寡薄恭己南面
在上不驕夕惕於位可稱自古何等王也仲曰陛下
中興之聖后少康光武之儔也顧命左右賜仲帛千
匹仲疑多陳讓德曰卿知調朕朕不知戲卿乎卿飾
對非實故亦虛言相賞賞不謬加何足謝也韓范進
曰臣聞天子無戲言忠臣無妄對今日之論可謂君
臣俱失德大悅賜範絹五十匹三年三月德如齊城
登營丘望見晏嬰塚顧左右曰禮大夫不通城葬平
仲古之一賢人達者而生安近市死葬近城豈有意
乎青州秀才晏謨對曰孔子稱臣先人乎仲賢矣豈
不知高其梁豐其禮蓋政在家門故儉以矯世存居
湫隘卒豈擇地而葬乎所以不遠門者猶冀悟平生
意也德悅之三月以太牢祀漢城陽景王廟遂北登

社首山東望鼎足因目牛山問謨以齊之山川賢否
故事謨歷對詳辨畫地成圖德深嘉之拜尚書郎五
年二月夜地震在栖之雞皆驚攪飛散三月德疾動
經旬幾於不振會前尚書右丞曹默自冀州來奔以
白酒解之乃瘳以默爲御史中丞封永熙侯五年正
月兄子超自秦還九月汝水竭十一月德疾篤夢魇
曰汝旣無子何不早立超爲太子不爾惡人生心戊
午引見羣臣於東陽殿議立超爲太子俄而震起百
僚驚越德亦不安還宮疾甚呼段后公主及超申以
後事執超手曰德若至曉更見公卿顧託以汝死無
所恨數目視公主欲有所言竟遂不能段后大言今
日召董中書造誥之超開目領之是夕薨於顯安宮
年七十爲十餘棺夜分出四門潛瘞山谷莫知其屍

所在虛葬於東陽陵諡獻武皇帝廟號世宗在位五年

慕容超

慕容超字祖明德兄北海王納之子秦滅燕以納爲廣武太守數歲去官與母公孫太妃就弟德家於張掖德從苻堅南征留金刀辭母而去及垂起兵山東張掖太守苻昌誅納及德之諸子公孫太妃以耆不合刑納妻段氏以懷妊未決執於郡獄掾呼延平德之故吏也將公孫及段氏逃於羌中而生超焉公孫氏臨卒授超金刀曰聞汝伯已中興於鄴都吾朽病將沒相見理絕汝脫得東歸可以此刀還汝叔也後因呂隆歸秦秦徙涼州民於長安超因而東歸母謂超曰母子得全濟者呼延氏之力也惠而不報天

不祐人乎今雖死吾欲爲汝納其女以答厚惠於是
納之超至長安佯狂行乞由是往來無禁濟陰人宗
正謙善卜相西至長安賣於路超行而遇之因就謙
相謙奇其姿貌超乃內斷於心不告母妻辭母詣霸
上乃與謙俱歸至諸關禁自稱張伏生二十日達梁
父建平六年四月至廣固呈以金刀且宣祖母臨終
之言德撫之號慟超身長八尺腰九圍姿器魁傑有
類於德德愛之名之曰超封北海王拜侍中驃騎大
將軍司隸校尉開府置佐十一年立爲太子己未僭
卽皇帝位大赦改建平六年爲太上元年三年七月
遣中書令韓範聘秦姚興許還超母妻八月秦使兼
員外散騎常侍韋宗還聘贈以千金超復遣右僕射
張華給事中宗正元聘奉送太樂伎一百二十人姚

興大悅還超母妻十月華發長安宗正元聘先反命
超悅遣征虜公孫五樓率騎二千迎於境上超親率
六宮迎於馬耳關四年正月大赦尊父北海穆王爲
穆皇帝母段氏爲皇太后居長樂宮妻呼延氏爲皇
后五年二月晉相劉裕率衆來伐三月晉師渡淮超
聞晉軍之盛自率衆四萬拒戰大敗奔還廣固徙郭
內民入保小城晉攻陷大城長圍列守超請爲藩臣
以大峴爲界裕不許六年正月超登天門朝羣臣於
城上殺馬以饗將士文武皆有遷授二月尙書悅壽
開門納晉師超出奔爲晉師所執送建康市斬之時
年二十六殺鮮卑王公已下三千餘人以男女萬餘
口爲軍賞始建平元年歲在己亥僭號居齊王爲劉
裕所滅在己酉年二十一年

南燕錄

口念重會故裝平天字德古百安翻錄
 南燕錄六條錄單王公百石三千餘人以其女
 南燕錄晉書出在燕晉臨河將裝東市博文
 北土燕燕也譽錄王文庭晉書卷之二月尚書
 又天神會來谷不特六月五日時登天門碑事
 月知人將小使晉文圖大然其國反裝
 南燕錄之燕自率裝四尊裝大銀裝裝
 試平一二月晉書卷之二月尚書
 南燕錄之燕自率裝四尊裝大銀裝裝
 六宮之公燕耳關四半平日大妹學父北燕
 試別裝而真公將正對率編之千餘裝
 南燕錄之燕自率裝四尊裝大銀裝裝

西秦錄

魏崔鴻撰

乞伏國仁

乞伏國仁隴西鮮卑人其先自漢北南出太陰山五世有祐鄰者晉太始初率戶五萬遷居高平川鄰卒子結權立遷於牽屯結權卒子利那立利那卒弟祁溼立祁溼卒利那子述延立遷於苑川述延卒祁溼子儻太寒立石勒之滅劉曜也懼而遷於麥田元孤山太寒卒子司繁立秦始皇中遷於度堅山建元七年秦將王統來伐繁率騎三萬拒統於苑川統潛襲度堅山部民五萬餘落悉降於統司繁乃詣統歸降苻堅拜南單于留之長安後以爲鎮西將軍鎮勇士川甚有威惠之稱司繁卒國仁卽位聞堅征晉奔敗

國仁收衆至十餘萬又聞堅爲姚萇所殺於是自稱大都督大將軍大單于領秦河二州牧改秦建元二十一年爲建義元年置武陵苑川等十一郡築勇士都城以都之三年苻登遣使拜仁大將軍苑川王四年六月薨僞諡曰烈王廟號烈祖

乞伏乾歸

乞伏乾歸國仁弟雄武有度略仁薨羣僚以仁子公府幼稚乃立乾歸爲將軍大單于河南王大赦改四年爲太初元年立邊氏爲后以南川侯出連乞都爲丞相九月遷於金城二年正月苻登遣使拜爲大將軍金城王六年立子熾盤爲太子七年登遣使授左丞相河南王假黃鉞加九錫之禮十月氏王楊定步騎四萬來伐乾歸勒衆而進大敗定軍斬定及首級

萬有七千於是盡有隴西之地十二月僭稱秦王大赦八年呂光來伐歸乃稱蕃遣子勃勃爲質旣而悔之十三年秦征西大將軍姚碩德率衆來伐入自南安峽歸次於隴西以拒碩德興潛師繼發乾歸聞兵將至率輕騎數千候興俄與中軍相失爲興追騎所逼戰敗遁歸苑川乃率騎數百馳上允吾禿髮利鹿孤逆歸之於晉興乾歸將叛謀泄懼爲利鹿孤所害謂其子熾盤曰姚興將盛吾將歸之今送汝兄弟及汝母爲質於是送熾盤兄弟於西平乾歸遂奔長安姚興大悅拜持節都督河南諸軍事河州刺史歸義侯十四年遣乾歸還鎮苑川盡以部民配之十八年正月乾歸至長安十九年五月苑川地震裂正月又朝長安二十年姚興慮乾歸終爲西州之患留拜主

客尚書以其子熾盤爲西夷校尉行河州刺史二十一年熾盤以長安亂將始乃招結諸部築城於嶮琅山以據之更始元年乾歸隨姚興如平流熾盤攻枹罕剋之遂遣使來告乾歸乾歸奔還苑川遂如枹罕留熾盤鎮之乾歸將衆二萬遷於度堅山諸將勸稱王七月僭稱秦王大赦改年置百官公卿以下皆復本位四年五月乾歸敗於五谿山有梟集於其手乾歸惡之六月爲兄子公府所殺公府出奔熾盤遷於枹罕遣弟廣武將軍智達追擒公府於嶮嶺山南輾裂之八月葬乾歸於枹罕陵仍僞諡武元王廟號高祖

乞伏熾盤

乞伏熾盤乾歸長子乾歸薨自稱大將軍河南王改

元爲永康元年以尙書令翟勒爲相國封拜各有差
二年熾盤討吐谷渾別統旁行長柳川掘達於渴渾
川大破之俘獲男女二萬三千五年正月有五色雲
起於南山盤大悅謂羣臣曰吾今年應有所定王業
成矣於是繕甲整兵以伺四方之隙五月聞儻西
征率步騎二萬襲樂都儻降遂并南涼兵強地廣
十月僭卽秦王位置百官立妻禿髮氏爲王后四年
熾盤子元基自長安逃歸拜尙書左僕射建宏元年
立第二子慕末爲太子領撫軍大將軍都督諸軍事
改元赦熾盤寢疾顧命太子慕末乃薨於外寢六月
葬武平陵諡文昭王廟號太祖

乞伏慕末

乞伏慕末字安石熾盤之第二子幼而好學有文才

建宏元年立爲太子熾盤薨僭卽秦王位大赦改年
爲承宏元年二月立萬載爲太子三年九月部民多
叛慕末焚城邑毀寶器率戶五千東如封爲赫連定
所拒遂圍安南十一月魏遣尙書庫結率騎五千迎
慕末衛軍吉毗固諫以爲不宜遂內徙徙之庫結引
還四年赫連定遣其叔北平公韋代率衆一萬攻南
安城內大饑人相食傳侍中乞伏延祚吏部尙書乞
伏跋跋踰城奔末乃銜璧出降送於上邽及宗族五
百餘人悉爲赫連所誅自國仁建義元年乙酉歲至
辛未四十七年

西秦錄

北燕錄

魏崔鴻撰

馮跋

馮跋字文起長樂信都人其先畢萬之後也子孫食采馮鄉因以氏焉晉永嘉之亂祖父和避地上黨父安雄有器量爲慕容永將永滅跋東徙和龍家長谷中跋夜夢天門開神光赫然燭於庭中永康末拜中衛將軍建始元年與二弟結謀襲殺慕容熙立高雲爲主正始元年以跋爲中外都督開府儀同三司錄尚書事封武邑公太平元年雲爲其幸臣離班桃仁所殺帳下督張秦李桑誅班及仁羣臣推跋爲主僭卽天王位大赦令曰義貴適時不必改作故陳氏代姜不徙齊號卽號燕國改爲太平元年追尊祖和爲

元皇帝父安爲宣帝子永爲太子三年七月以太子
永領大單于內置四輔七年建大學以長樂劉軒營
丘張熾成周翟崇爲博士簡二千石已下子弟年十
五以上教之十四年宿軍地燃一旬乃滅十七年二
月北部人趙壽女旣嫁化爲男娶妻而無子跋問諸
羣臣曰此何祥尙書左丞傅權對曰漢世雌雞爲雄
陰變爲陽君替臣僭之象卒有婦人專寵王莽篡位
今女爲男臣將無君之徵跋曰將何以禳之權曰桑
穀生朝太戊修德而殷道中興熒惑守心宋景責躬
延齡二紀唯修身崇善可以轉禍爲福十八年八月
立子翼爲太子跋戒之曰吾聞君人以學爲本不學
無以立尊敬師傅人倫之始汝其夙夜虔虔欽承明
訓二十二年八月跋寢疾召中書監申秀侍中楊哲

於內寢謂之曰吾患當不濟卿等善相吾子參決萬
機九月跋疾甚輦而臨軒命太子翼勒兵聽政以備
非常宋夫人規立其子受惡翼聽政謂之曰上欲將
瘳奈何便欲代父臨天下乎翼性仁弱遂還東宮一
日三省疾宋夫人矯絕內外遣閤寺傳問而已翼及
大臣皆不得見跋弟宏於是與壯士數千人裹甲入
禁中宿衛皆不戰而敗宋夫人命閉東閣宏家僮庫
斗頭勁捷有勇力踰閣而入至於皇堂射殺御女一
人跋驚懼而薨宏遣修城告曰天降凶禍大行崩背
太子不侍疾羣公不奔喪疑有逆謀圖危社稷吾備
太弟之親遂攝大位以寧國家百官叩門入者進階
二等太子翼率東宮兵出戰敗退兵皆奔散宏遣使
賜死命宗正馮哲黃門盧招典葬事於東宮葬跋於

長谷陵僞諡文成皇帝廟號太祖

馮宏

馮宏字文通跋之季弟高雲篡位拜中領軍封汲郡公太平元年拜尚書右僕射改封中山公遷尚書令司徒錄尚書事宏卽天王位大興元年正月壬午朔大赦改年二月立夫人慕容氏爲皇后二年正月立少子王仁爲太子六月有鼠集城西盈數里地中西行至水前銜馬尾後者迭相銜尾而渡識者以爲民遷之象七月魏師來伐神高八月召城邊東營丘城周四郡並降魏九月魏師還宏徙民四萬餘戶而西三年六月魏永昌王來伐五年四月遣右衛孫德乞師於宋十二月又遣尚書楊伊請迎於句麗六年二月端門崩四月魏又遣侍中建興公虞弼東平公鵝

青來攻剋白狼句麗將葛居孟光率衆數萬隨楊伊來迎屯於臨川尙書令郭生因民之憚遷開門而引魏軍魏軍疑而不赴生遂勒衆攻宏宏引句麗兵入自東門與生戰於闕下生中流矢卒句麗軍旣入城取武庫甲以給其衆城內美女皆句麗軍人所掠五月乙卯宏率龍城萬戶東徙焚燒宮殿火一旬不絕令婦人被甲居中楊伊等勒精兵於外而居光率騎後殿方軌而進前後八十餘里魏軍追至遼水不擊而還遣使徵宏於句麗後二年爲句麗所殺僞諡昭成皇帝自馮跋太平元年歲在乙酉至宏滅亡之歲丙子二十八載

夏錄

魏崔鴻撰

赫連勃勃

赫連勃勃朔方人匈奴左賢王去卑之後劉元海之族也曾祖名武前趙嘉平中以宗室封樓煩公拜安北將軍丁零中郎將祖豹子後趙建武中拜平北將軍左賢王父衛辰苻堅以爲西單于督攝河西諸虜屯於代來城因秦末兵亂遂有朔方之地控弦之士三萬八千姚萇拜辰大將軍河西王大單于魏師來伐辰遣子力侯提率騎二萬拒戰河東爲魏所敗遂乘勝濟河攻剋代來執辰殺之勃勃辰第三子奔秦高平公沒奕於奕於妻之以女姚興以勃勃爲持節安北將軍五原公配以三交五部鮮卑及雜虜二萬

餘落鎮朔方時河西鮮卑杜崙獻馬八千匹於秦濟河至大城勃勃留之召其衆二萬襲殺高平公沒奕於而并其衆衆至數萬自稱天王大單于大赦改宏始十年爲龍昇元年置百官以匈奴夏后氏之苗裔僭稱大夏以大兄右地代爲丞相代公發領北民夷十萬於朔方黑渠之界營起京城大赦改龍昇七年爲鳳翔元年令曰朕之皇祖北遷幽朔改姓妙氏後從母爲劉氏從母姓非禮也古之氏族無常王者繫天爲子是爲徽赫實與天連今改姓曰赫連氏庶協皇天之意支庶非正統者以鐵伐爲氏庶朕宗族子孫剛銳如鐵皆堪伐人二年立夫人梁氏爲后立子瓚爲太子四年九月劉裕滅秦入於長安十二月裕留子義真鎮長安而還勃大悅遂圖進取之計遣太

子瓚率騎二萬南伐長安五年義真遣龍驤將軍沈
田子率衆逆戰瓚擊敗之退屯列迴堡八月勃勃進
據咸陽劉裕大懼乃召義真東鎮洛陽勃勃入長安
正月羣臣勸勃勃稱皇帝三月築壇於霸上卽皇帝
位大赦改鳳翔六年爲昌武元年冬十月太子瓚領
大將軍雍州牧錄南臺尙書事鎮長安十一月勃勃
還統萬統萬勃勃所
都之城名也所建宮殿苑囿大成遂大赦改
昌武二年爲真興元年刻石都南頌紀功德四月追
尊父衛辰曰桓皇帝廟號太祖母苻氏爲皇太后祖
父豹曰宣皇帝曾祖武曰景皇帝高祖訓芝曰元皇
帝五月雨魚於統萬二年十月起沖天臺於統萬年
山欲登之以望長安六年勃勃將廢太子瓚爲秦王
以酒泉公倫爲太子瓚聞將廢己率衆七萬北伐倫

倫率騎三萬拒之戰於平爲瓚所敗倫死之太原公
昌率騎一萬襲殺瓚率衆八萬五千歸於統萬勃大
悅立昌爲太子七月勃勃寢疾甚輦昇永安殿召羣
臣囑以後事薨於永安殿年四十五諡武烈皇帝葬
嘉平陵廟號世祖

赫連昌

赫連昌一名折勃勃之第三子身長八尺魁岸美姿
貌勃勃薨卽位於永安臺大赦改真興七年爲永光
元年七月查城劉睹川有青石大如馬頭浮在水上
逆流而行人見而送之十月魏乘虛來伐三年五月
戰於黑渠爲魏所敗昌與數千騎奔還魏追騎亦至
昌留河內公費連烏提守高平徙諸城民七萬戶于
安定以都之四年二月魏軍至安定攻城三月城潰

昌奔秦州魏東平公鵝青追擒之送於魏魏封昌秦王尚始平公主爲魏所殺

赫連定

赫連定勃勃第五子鳳翔二年封平原公雍州牧鎮長安率衆赴安進封平原王大將軍領司徒昌爲魏所擒定遂率遺衆數萬據平原僭稱皇帝大赦改承光四年爲勝光元年進征南大將軍白蘭王吐谷渾莫潰爲開府儀同三司河南王十月畋于陰盤登苛藍山而望統萬城泣曰先帝以朕承大業者豈有今日乎使天假朕年當與諸卿建王季之業俄而有狐羣百數鳴于定傍令射之無所獲定惡之曰此大不嘉咄咄天道復何言哉三年秋魏軍來襲十月剋安定進攻平原十一月定遂掠民五萬戶西奔上邽四

年河南王莫瓚因戎狄之衆東面以爭天下魏遣益
州刺史沒利延寧州刺史拾虎率騎三萬來伐遂擒
定送于魏勃勃初號龍昇元年歲在丁未至是歲在
辛未二十五年也

夏錄

識

右崔鴻十六國春秋按魏書鴻以劉淵石勒慕容雋苻健慕容垂姚萇慕容德赫連勃勃張軌李雄呂光乞伏國仁秃髮烏孤李暠沮渠蒙遜馮跋等並因世故跨僭一方各有國土未能統一鴻乃撰爲十六國春秋勒成百卷因其舊記時有增損褒貶而以世仕江右故不錄晉劉蕭之書又別作序例一卷凡一百二卷劉知幾史通云鴻初求諸國史猶闕蜀事推求十有五年始於江東購獲乃增其篇目勒爲十卷隋志凡百卷唐志一百二十卷宋國史志祇有二十餘卷而文獻通考并不著錄則晁陳二家必俱未見此書也按晁說之云司馬溫公修通鑑所考十六國春秋非鴻全書則在宋時已散佚久矣故經義考列入

佚書門且云今世所傳十六國春秋乃後人采晉書
北史冊府元龜太平御覽等書集成之非原書也若
叢書本凡十六國各為篇卷又祇存其略云汝上王
謨識

十有五... 二... 春... 姑... 子... 林... 奇... 婚